

# Tunku Azizah raikan asnaf

Berbuka puasa bersama, sampaikan sumbangan



**Tunku Azizah (tengah) bersama anakanda-anakanda baginda meraikan asnaf di Restoran McDonald's di Indera Mahkota.**

**KUANTAN** – Seramai 165 orang daripada keluarga asnaf sekitar daerah Kuantan dan Pekan di rai dalam majlis berbuka puasa bersama Tengku Puan Pahang, Tunku Azizah Aminah Maimunah Iskandariah di McDonald's Indera Mahkota di sini.

Majlis anjuran Universiti Malaysia Pahang (UMP) dengan kerjasama Persatuan Wanita UMP (Matahari) dan UMP Advanced Education turut menyampaikan sumbangan makanan, keperluan harian dan pakaian kepada 30 keluarga terbahit.

Naib Canselor UMP, Profesor Datuk Dr Daing Nasir Ibrahim berkata, UMP mengambil inisiatif mendekati masyarakat melalui Program Jejak Asnaf Fakir Miskin ber-

tujuan membantu golongan memerlukan.

“Program Jejak Asnaf Fakir Miskin memberi peluang warga UMP turun padang menghulurkan sumbangan keperluan asas dan baju raya untuk mereka nikmati kegembiraan menjelang Syawal nanti.

“Usaha ini juga dapat mendekati penduduk sekitar dan membangunkan komuniti setempat terhadap program kemasyarakatan dan juga sukarelawan,” katanya.

Selain itu, katanya, My Gift UMP adalah inisiatif mengumpul sumbangan daripada mana-mana pihak bagi mengumpul tabung tajaan pelajaran, penyediaan kemudahan kepada pelajar dan membudayakan semangat membantu golongan

memerlukan.

Menurutnya, sepanjang Ramadan, UMP turut mengemukakan program Jelajah Ramadan Asian 2016 yang memberi peluang kepada pelajar UMP merasai pengalaman bersahur, berpuasa dan berbuka bersama anak-anak yatim di Rumah Kebajikan Nurul Dayah di Aceh, Indonesia.

Sementara itu, bagi Mohd Khasan Ridu, 43, tidak menyangka kedatangan Ramadan kali ini memberi sinar buat mereka sekeluarga dan turut terharu dengan sumbangan yang diberikan untuk persiapan raya mereka suami isteri bersama lapan anak.

Bagi Abdullah Yakob, 57, sumbangan itu dapat meringankan bebannya yang turut mempunyai dua anak OKU.